

Rapport dalla presidenta dil Cussegli pastoral 2021/22

Suenter dus onns da pintga activitatad essan nus semess avon in onn cun bia slontsch vid la laver. Sco tema digl onn vein elegiu: "Jeu sun la vit e vus essas mias frastgas." Frastgas portan fretg ed era nus lein purtar fretg cun sestentar per ina buna cuminanza. Aschia vein duront igl onn organisau da tuttas sorts sentupadas. Entginas da quellas sentupadas less cuort menziunar. Ils detagls anfleis vus sin nossa pagina dalla pleiv: www.pleiv-breil.ch.

Bialas sentupadas denter ils convischins da lunsch e da maneivel dat ei adina a caschun dils aperitivs da perdananza ni Dumengialva.

In auter punct che astga buca muncar el calender ei il di da suppa. Uonn schizun cun la participaziun dils scolars da musica d'Albert ed agid dils cresmands.

En buna collavuraziun cun las uniuns da mummas vein organisau la dumengia da suppa ed il di d'oraziun mundiala. Arver nos egls e veser la pupira dil proxim. Las menadras dils ministrants han organisau ina sentupada ellas minas a Sursaissa. Igl Advent han ellas zambergiau latiarnas culs minis e purtau ellas en casa da vegls a Trun. Leu han ellas repartiu las latiarnas, raquintau ina historia ed embelliu il suentermiezdi cun canzuns da Nadal.

Da Nadalnotg han ellas segidau cul survetsch divin da famiglia ed igl ei stau in bi mirar co ils affons ein separticipai cun plascher vid il cant, il leger e giugar. In grond applaus per lur presentaziun ed ina engraziel fetg a Marina Maissen, Alexa Albrecht, Andrea Hitz e Petronella Meier per las bunas ideas ed il grond engaschi.

Naturalmein astga nies usit da retgs era buca muncar. Nos retgs e reginas han purtau la benedicziun els quartiers da nos vitgs e delectau pign e grond cun lur canzuns.

In auter punct culminont ei il pelegrinadi ad Andiast staus. Ensemen da viadi accumpaignai da tuns dalla flauta d'indians e la historia digl egl da Diu. Festivar survetsch divin da cumonza e teisser nos giavischs en ina biala decoraziun. E la finala buca d'emblidar la grillada sin plaz scola. Merci pil beingartegiar a Jorge e Brida e tut quels ch'ein stai dalla partida.

Nossa davosa sentupada ei stada avon cuort. Nus havein evidau nos attempai all'uncziun dils malsauns e vegls. Era cheu ha la cuminanza buca astgau muncar. Ina buna paterlada tier petta e caffe dat forza e curascha pil mintgadi ed en in ni l'auter liug ha ei aunc dau ina surpresa.

Enten preparar miu rapport sun vegnida pertscharta conta glieud che ei involvada en nossa pleiv. Baselgia ei cuminanza- dapli che mo nies baghetg. E sco bia ga segidan biaras persunas sin ina moda ni l'autra, e schizun el zuppu, a tgirar nossa frastga. Els gidan nus dil Cussegli Pastoral e sur Sajan enten viver lur cardientscha el mintgadi a mantener viva nossa cuminanza. Cuminanza viva leu

nua che mintgin segida tenor meglier saver e puder cun sias habilitads. In grond e cordial engraziament a tut quels che porschan maun als chorus, las musicas, las uniuns da dunnas e mummas, las uniuns da giuventetgna, ils purtaders da processiun, gidonters da sepultura e digl usit da retgs, redacturas e redacturs dil Fegl parochial ed aunc bia bunas olmas zuppadas.

E per finir in zitat: En sesez dattan las relaziuns valeta a nossa veta.

Andrea Cathomas-Friberg
Presidenta dil Cussegl pastoral